

Date – 11/05/2025

Time - 7:30 -7:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- 1. Larsap Gen (Rtd) Vijay Kumar Singh an LADC-a Floor Test nei tura thu a pek angin LADC Chairman Pu T. Zakunga’n May ni 16 zirtawpni-ah Session a ko.
- 2. Vawiin hi “Nute Ni’ (Mothers’ Day) a ni a, Mizorama Chhandamna Sipai Pawl (The Salvation Army) chuan he ni pual hian hmun hrang hrangah hun an hmang ang.
- 3. Nausen kum khat hnuai lam thi zat tehna ah Mizoram chu rampum huapa dinhmun tha ber a ni a, Nau piang 1000 zela nausen 3 thi ang niin rampum huapa dinhmun tha ber an ni.
- 4. Nimin tlai dar 5 atang khan India leh Pakistan te chuan inkahhai an remti.

<><><>

LADC

Larsap Gen (Rtd) Vijay Kumar Singh an Lai Autonomous District Council-a Floor Test nei tura thu a pek angin LADC Chairman Pu T. Zakunga’n May ni 16 zirtawpni-ah Session a ko.

Larsap in LADC thutkhawma Floor Test neih tur chungchanga thuchhuah tarlan danin tunhnaia BJP leh a thurualpui MNF thawhdunna United Democratic Alliance chu sawrkarna an siam thei ani tih finfiahna Floor Test nei tura tih an ni a, hetah hian BJP kaihhruai sawrkar chuan thlawptu an nei tam tawk em tih finfiah a ni dawn a ni.

Larsap hian Floor test neih tur chungchangah hian May ni 8 khan thuchhuah siamin a rang thei ang bera buatsaih turin thu a pe a, a tuk May ni 9-a thuchhuah tarlan danin LADC Session koh nan hun pek belh annih thu leh Session chu May ni 16 hma ngeia ko turin hriattirna pek an ni a, hemi chungchangah hian LADC Chairman Pu T. Zakunga chuan May ni 8 khan thuchhuah siamin LADC Session chu May ni 16 chawhma dar 10:30 a neih turin a ko a ni.

Puan tawh angin, LADC-a sorkar mumal a din theih loh avangin boruak a tang chho reng a, BJP leh MNF thawhdunna, United Democratic Alliance CEM atan MDC Pu N Zangura Governor in a ruat hnuah May ni 8 zingkar khan CEM atan Pu N. Zangura chu rinawmna thu tiamtira lakluh a ni a, CEM lakluh hi Lai Students' Association ten dan an tum ni a hriat a nih avangin LADC Office Complex, Council Veng leh New Vengpuiah te BNSS hnuaiah ni 2 chhung punkhawm khap a,

Hetih lai hian Lai Student’s Association chuan May ni 8-a thuchhuah an siam ah CEM lakluhna mipui hriatloha buatsaih chu Lawngtlai District mipuite zahlohna ani an ti a, hriatthiam harsa an ti tih sawiin a tul angin hma an la zel dawn tih an sawi bawk.

LADC ah hian tun dinhmun ah BJP MDC pahnih, MNF MDC 11 leh thlawptu Congress MDC pakhat nen BJP kaihhruai United Democratic Alliance ah hian Member 14 an awm a, ZPM in Member 11 a nei bawk a ni.
(Lalnggheta Ralte PTC Lawngtlai)

<><><>

HEALTH MINISTER

Health Minister Pi Lalrinpuii'n nimin khan District Hospital, Mamit tlawhin sorkar damdawi inte chu nursing care-ah tan la turin a chah.

Health Minister chuan thawktu indaih lohna chu chhuanlamah siam mai lo va, theih tawpa tan la zel turin damdawi in thawktute a ngen a, mipuiin private hospital an pan tamna chhan chu nursing care a that vang a ni tih sawiin sorkar damdawi inah pawh theihtawp chhuah a pawimawh a ti a. District hospital atanga hmunpui lam refer tam lo thei tura tan lak a tul thu leh, chutiang tur chuan District hospital tih changtlun zel an tum thu a sawi bawk.

Pi Lalrinpuii chuan Mizoram Health Insurance Scheme chu sorkar hnathawk, CSS leh pensioner ten an zawm mek tih a sawi a, a thatzia an hmu mek tih sawiin Synod Hospital pawhin damlo tam tak an ngaihdam avanga sum tam tak an hloh avangin Mizoram Health Insurance Scheme zawm turin Hopital thuneitute pawh a biak thu a sawi bawk.
(DIPR)

<><><>

MOTHER’S DAY

Vawiin hi “Nute Ni’ (Mothers’ Day) a ni a, May thla Pathianni vawi 2-naa hman thin Mothers’ Day hi Nute hriatrengna leh chawimawina hun atana buatsaih thin a ni.

Nute Ni pual hian khawvel hmun dange rualin Mizorama Chhandamna Sipai Pawl (The Salvation Army) chuan hun an hmang dawn a, Mizorama Chhandamna Sipai Pawl Biak in tinah Thianghlimna Inkhawm neih a ni dawn a. He inkhawmah hian Pathian thuchah ngaihthlak a nih bakah lawmthu sawina leh kum liam ta chhunga Nu, boral tate sunna hun hman a ni dawn a. Nute hnenah Pangpar hlan a ni bawk ang.

Kum 1920 khan Salvation Army rorelna sang International Management Council chuan an Kohhran tan ‘Nute Ni’ chu High Day- ah a puang a, India ramah pawh kum 1920 atang hian ‘Nute Ni’ hi hman tan a ni a, Kum 1914 May ni 8 khan USA President, Woodrow Wilson-a chuan Nute Ni hi rampuma hman a nih tur thu leh sawrkar building-ah te an ram flag tar turin thupek a chhuah a. Kum tin May thla Pathianni vawi 2-na chu khawvel ram dange pawhin Nute Ni atan an hmang ve ta a ni.
(Desk)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

SPEAKER

Assembly Speaker Pu Lalbiakzama'n nimin khan Assam Kut pui ber, Rongali Bihu lawmna hun hmanpuiin Mizorama Assamese awmte chu he Kut pual hian duhsakna chibai a buk.

Berawtlang Multipurpose Cultural Complex-a nimina hun hmanah hian Pu Lalbiakzama chuan Mizoramah Rongali Bihu lawmnaah Assamese unau ten Khuallian atan an sawm chu a ngaihlu tih a sawi a, hmarchhak unau pasarihte inlungualna leh inpumkhatna atan Assam State chu an pawimawh tih sawiin, Rongali Bihu chu Assamese-te tana kumthar lawmna, buhseng lawmna hun leh inpumkhatna kut a ni a, he hun lawmawm kaltlang hian Assamese unaute pawh Hmarchhak unau pasarih te inpumkhatna atan hmahruaitu ni turin a sawm tih a sawi bawk.

Speaker chuan Assam State chu India Hmarchhak tan Agriculture a hmahruaitu an nihnaah lawmpuiin Hmarchhak Buhzem ni chhunzawm zel turin duhsakna a hlan nghal bawk a ni.
(Desk)

<><><>

MIZORAM TOPS IMR

Nausen kum khat hnuai lam thi zat tehna ah Mizoram chu rampum huapa dinhmun tha ber a ni a, Infant Mortality Rate ah hian Sikkim leh Manipur te nen Nau piang 1000 zela nausen 3 thi ang niin rampum huapa dinhmun tha ber an ni.

Nimin khan National Health Mission hnuai RMNCHA buatsaihin Planning & Programme Implementation Conference Hall ah review meeting neih a ni a, hetah hian Mizoram chu India rama Infant Mortality Rate dinhmun tha ber anih thu tarlan niin India sawrkarin survey a tihchhuah hnunung ber Sample Registration Survey ah chuan Mizoram IMR chu 3-ah dah a ni a, India ramah state 3 ti tha ber zingah a tel a ni.

National Health Mission Director Dr Lily Chhakchhuak chuan IMR target chu National Health Policy 2017 in kum 2025 ah chuan 16 aia sang lo tur leh SDG 2030 chuan 12 turin a rawn ti tih sawiin Mizoram chu an tling sa tawh a ti a, nau nu chung a thi tehna Maternal Mortality Rate nikumah 18 an nei tih sawiin Mizoram chu mi cheng an tlem avangin chhutsak an ni ngailo a ti a, nau chung a nu thihna uluk taka chhui thin anih thu a sawi bawk.

<><><>

MIGOSTU

Mizoram Government School Teachers Union-chuan sawrkar laka an thil phutte sawrkarin a ngaihtuah nan May thla chhung an ngaichang dawn.

Mizoram sawrkar school zirtirtu inzawmkhawm chuan sawrkar hmasa in zirna in hrang hrang, dinhmun sang zawka a hlankai te tun sawrkarin dan siamthat ngai leh fello chhuanlama a paih chu sorkar sikula dah let leh ni se an ti a, heng bakah hian kum tam tak school Headmaster lo ni tawhte teacher-a tlak thlaktir vekna tur dan siam chu hlih phutin April ni 8 atanga ni 12 chhung khan Badge dum belin hna an thawk a. An thil phut zingah hian sorkarin tehfung a hmanah thingtlang leh khawpui inang renga an siam chu dik lo an tih thu sawiin, thingtlanga school te tan kaisan ve theihna a awm tawh dawn lo nia an hriat avangin dan thar an siam chu sut leh vat turin an phut tih anlo sawi tawh a ni.

MIGOSTU hian thil phut chungchanga hmalak dan tur ngaihtuahin tunkar khan Zarkawt Community Hall-ah Special Conference an nei a, Sorkar-a an thil phut chungchangah tun thla chhung Sorkar ngaihchan ni se, hemi hnua an beisei ang hmalakna a awm loh chuan No Teaching Day hman ni se an ti a ni.

(Desk)

<><><>

CEASEFIRE

Nimin tlai dar 5 atang khan India leh Pakistan te chuan inkahhai an remti a. Foreign Secretary Vikram Misri chuan hemi chungchangah hian chanchinbumite kawmin ram pahnih sipaite chuan khawmual, van leh tuipuia inkahna thleng mek chu tlai dar 5 khan tihtawp an rel a ti a. Pakistan Director General of Millitary Operations chuan vawiin chawhnu inkahhai chungchangah India a rawn bia tih sawiin hemi hnu hian sawiho niin inhriatthiamna an nei thei ta a ni a ti.

(Newsonair)

<><><>